

Na osnovu člana 21. stav (3) Zakona o raseljenim licima i povratnicima u Federaciji Bosne i Hercegovine i izbjeglicama iz Bosne i Hercegovine ("Službene novine Federacije Bosne i Hercegovine", broj: 15/05), te Plana povratka, obnove, gradnje i razvoja održivosti povratka za 2026. godinu, usvojenog Zaključkom Vlade Federacije Bosne i Hercegovine, broj: 296/26 od 06.03.2026. godine, Federalno ministarstvo raseljenih osoba i izbjeglica raspisuje

JAVNI POZIV

za pružanje podrške osnaživanju i razvoju poslovnih subjekata u vlasništvu povratnika u 2026. godini

I. PREDMET JAVNOG POZIVA

Predmet javnog poziva je dodjela finansijskih sredstava u okviru Programa pomoći održivom povratku – "Podrška osnaživanju i razvoju poslovnih subjekata u vlasništvu povratnika u 2026. godini", namijenjenih poslovnim subjektima u vlasništvu povratnika koji imaju najmanje 1 (jednog), a najviše 5 (pet) uposlenih radnika, registrovani su i aktivno posluju najmanje 6 (šest) mjeseci, te imaju sjedište na području bosanskohercegovačkog entiteta Republike Srpske u jedinicama lokalne samouprave sa manjinskim povratkom, ili na području entiteta Federacija Bosne i Hercegovine ili na području Brčko distrikta Bosne i Hercegovine.

II. CILJ JAVNOG POZIVA

Cilj javnog poziva je unapređenje održivosti poslovanja i jačanje ekonomskih kapaciteta poslovnih subjekata u vlasništvu povratnika kroz pružanje finansijske podrške usmjerene na njihov razvoj, modernizaciju i povećanje konkurentnosti, a radi jačanja održivog povratka i ekonomske reintegracije povratnika u povratničkim sredinama.

III. PRAVO UČEŠĆA

Pravo apliciranja imaju:

- Poslovni subjekti u većinskom vlasništvu povratnika koji na dan podnošenja prijave na ovaj javni poziv imaju najmanje 1 (jednog), a najviše 5 (pet) uposlenih radnika,
- Poslovni subjekti koji su registrovani i aktivno posluju najmanje 6 (šest) mjeseci do dana podnošenja prijave na javni poziv,
- Poslovni subjekti koji su registrovani kao: privredna društva, samostalni poduzetnici, obrti, trgovačke radnje ili druge samostalne djelatnosti na području Bosne i Hercegovine.

IV. OGRANIČENJE UČEŠĆA

U ovom javnom pozivu ne mogu učestvovati javne institucije, ustanove i javna preduzeća, udruženja građana, preduzeća čiji su osnivači udruženja građana ili vjerske zajednice, kao ni poslovni subjekti koji u posljednjih 5 (pet) godina nisu izvršili ugovorene obaveze prema Federalnom ministarstvu raseljenih osoba i izbjeglica po osnovu ranije dodijeljenih sredstava putem javnih poziva i programa Ministarstva.

V. OPĆI KRITERIJI I POTREBNA DOKUMENTACIJA

Aplikanti su prilikom prijave na Javni poziv obavezni dostaviti sljedeće:

1. Prijavni obrazac, koji je dostupan na internet stranici Ministarstva www.fmroi.gov.ba, ili se može preuzeti lično u Ministarstvu, na adresi Hamdije Čemerlića broj 2, Sarajevo, čitko popunjen, potpisan i ovjeren pečatom podnosioca prijave;
2. Biznis plan sa finansijskim planom ulaganja u investiciju, **na obrascu** koji je dostupan na internet stranici Ministarstva www.fmroi.gov.ba, ili se može preuzeti lično u prostorijama Ministarstva, na adresi Hamdije Čemerlića broj 2, Sarajevo, čitko popunjen, potpisan i ovjeren pečatom podnosioca prijave,
3. Rješenje o registraciji izdato od nadležnog organa, u originalu ili ovjerenoj fotokopiji, koja nije starija od 30 (trideset) dana;
4. Uvjerenje/potvrda o poreznoj registraciji kod Porezne uprave – JIB broj (ovjerenu fotokopiju dostaviti u 2 (dva) primjerka);
5. Dokaz da poslovni subjekt posjeduje aktivan transakcijski račun (potvrda banke o aktivnom transakcijskom računu, izdata nakon dana objavljivanja ovog javnog poziva; original ili ovjerenu fotokopiju potvrde dostaviti u 2 (dva) primjerka);
6. Uvjerenje/potvrda o urednom izmirenju direktnih poreza, doprinosa za PIO/MIO i doprinosa za zdravstveno osiguranje, izdato od Porezne uprave, ne starije od 3 (tri) mjeseca od dana podnošenja prijave, ili sporazum ili drugi akt Porezne uprave kojim se potvrđuje uredno izmirenje utvrđenih poreznih dugovanja po osnovu direktnih poreza, doprinosa za PIO/MIO i doprinosa za zdravstveno osiguranje, ne stariji od 30 (trideset) dana (u originalu ili ovjerenoj fotokopiji);
7. Dokaz o broju uposlenih radnika – Lista osiguranih lica za obveznika doprinosa, ne starija od 30 (trideset) dana od dana podnošenja prijave, izdata od nadležne područne jedinice/ispostave Porezne uprave. Lista mora biti dostavljena u originalu ili ovjerenoj fotokopiji.
8. Uvjerenje o ostvarenom povratku za većinskog vlasnika ili osnivača. Uvjerenje o povratku može biti na ime vlasnika ili na ime nosioca domaćinstva u kojem vlasnik živi, uz Izvod iz matične knjige rođenih, ukoliko je vlasnik rođen nakon 30.04.1991. godine, i Obavještenje o prebivalištu (CIPS) u mjestu stalnog prebivališta (ne smije biti starije od 30 (trideset) dana od dana podnošenja prijave na javni poziv).

VI. POSEBNI KRITERIJI - DOKUMENTACIJA ZA BODOVANJE

Pored obavezne dokumentacije, aplikanti mogu dostaviti i dodatnu dokumentaciju koja se vrednuje u postupku ocjene i bodovanja prijave, i to:

1. Potvrda/uvjerenje izdato od nadležne institucije, kojim se dokazuje pripadnost vlasnika jednoj od ranjivih kategorija, ukoliko pripada jednoj od sljedećih kategorija: lica mlađe životne dobi (do 35 godina starosti), žene, pripadnici i članovi porodica boračke populacije (RVI, demobilisani borci, članovi šehidskih porodica/podporodica poginulih boraca), civilne žrtve rata i dobitnici najvećih ratnih priznanja (Zlatni ljiljan i Zlatna policijska značka).
2. Uvjerenje o ostvarenom povratku za radnike iz povratničke populacije koji se nalaze na Listi osiguranih lica (u originalu ili ovjerenj fotografiji, koja nije starija od 30 (trideset) dana).
3. Preporuka lokalne zajednice ili drugog nadležnog organa i/ili institucije koja djeluje u oblasti u kojoj podnosilac prijave obavlja registrovanu djelatnost, a kojom se može potvrditi značaj, opravdanost i razvojni potencijal podnosioca prijave i predložene investicije, u originalu ili ovjerenj fotografiji.
4. Kvalitet biznis plana sa finansijskim planom ulaganja u investiciju predstavlja poseban kriterij bodovanja u okviru ovog javnog poziva. Prilikom ocjene i bodovanja uzimaju se u obzir sljedeći elementi: stepen razrađenosti planiranih aktivnosti, realnost i izvodljivost poslovne ideje, finansijska utemeljenost i održivost investicije, očekivani efekti ulaganja, kao i doprinos ciljevima održivog povratka i ekonomskog razvoja povratničkih sredina.
5. Kao poseban kriterij za ocjenu i bodovanje aplikacija uzima se u obzir stepen razvijenosti jedinice lokalne samouprave na čijem području se realizuje investicija, i to u Federaciji Bosne i Hercegovine prema rangiranju od izrazito nerazvijenih prema razvijenim jedinicama lokalne samouprave, u skladu sa važećim indeksom razvijenosti jedinica lokalne samouprave, a u Republici Srpskoj kao poseban kriterij uzima se u obzir da se investicija realizuje na području jedinice lokalne samouprave u kojoj je ostvaren manjinski povratak.

VII. FINANSIJSKA SREDSTVA

Odobrena sredstva po jednom korisniku mogu iznositi do 30.000,00 KM. Ukupan iznos planiranih sredstava za realizaciju ovog javnog poziva iznosi do 1.500.000,00 KM. Sredstva odobrena po ovom javnom pozivu doznačit će se jednokratno, nakon potpisivanja ugovora o namjenskom korištenju sredstava, na transakcijski račun korisnika. Namjenski utrošak dodijeljenih sredstava i ispunjavanje svih ugovornih obaveza, bit će predmet praćenja od strane Ministarstva.

VIII. OBAVEZE KORISNIKA

Korisnici sredstava sa kojima bude zaključen Ugovor o namjenskom korištenju budžetskih sredstava obavezni su:

- namjenski utrošiti dodijeljena sredstva za unapređenje poslovanja, i to za nabavku stalnih sredstava ili za izgradnju, proširenje i/ili adaptaciju poslovnih objekata.
- Korisnik može najviše 20% od ukupnog iznosa dodijeljenih sredstava pravdati kao troškove redovnog poslovanja (troškovi repromaterijala (potrošnog materijala), komunalne troškove i/ili troškove zakupa poslovnih prostorija).
- Korisnik može najviše 30% od ukupnog iznosa dodijeljenih sredstava pravdati kao troškove plaća, doprinosa za PIO/MIO i doprinosa za zdravstveno osiguranje uposlenih radnika iz kategorije povratnika.

IX. NAČIN IZBORA KORISNIKA

Izbor korisnika po ovom javnom pozivu vršit će Komisija koju rješenjem imenuje federalni ministar raseljenih osoba i izbjeglica. Komisija će kontinuirano razmatrati pristigle prijave, u skladu sa odredbama ovog javnog poziva i propisanim procedurama za izbor korisnika.

U slučaju da dva ili više aplikanta ostvare isti broj bodova, prednost će imati poslovni subjekt čija je investicija ocijenjena većim brojem bodova po kriteriju kvaliteta biznis plana sa finansijskim planom ulaganja u investiciju.

Ukoliko i nakon primjene navedenog kriterija dva ili više aplikanta ostvare jednak broj bodova, Komisija će prednost dati aplikantu koji ima veći broj uposlenih radnika iz kategorije povratnika.

X. PRIKUPLJANJE I OBRADA LIČNIH PODATAKA

Podnošenjem prijave na ovaj javni poziv, podnosilac prijave daje saglasnost Federalnom ministarstvu raseljenih osoba i izbjeglica za obradu svojih ličnih podataka u skladu sa Zakonom o zaštiti ličnih podataka. Lični podaci obrađuju se isključivo radi provjere ispunjenosti uslova javnog poziva, pripreme i zaključivanja ugovora, realizacije dodjele sredstava, vođenja evidencije korisnika i izvršenja plaćanja. Podaci se mogu dostavljati trećim licima isključivo u slučajevima i na način propisan zakonom.

Objava ličnih podataka ograničit će se isključivo na podatke koji su neophodni radi osiguranja transparentnosti postupka dodjele sredstava, u skladu sa Zakonom o zaštiti ličnih podataka i drugim važećim propisima. Podnosilac prijave ima pravo da zatraži pristup, ispravku, brisanje ili ograničenje obrade svojih ličnih podataka, u skladu sa zakonom.

XI. ROK ZA PRIJAVE I NAČIN PODNOŠENJA PRIJAVA

Prijavni obrazac sa traženom dokumentacijom dostaviti lično ili poštom preporučeno, na adresu:

Federalno ministarstvo raseljenih osoba i izbjeglica

Hamdije Čemerlića 2

71 000 Sarajevo

sa naznakom

"Prijava na Javni poziv za pružanje podrške osnaživanju i razvoju poslovnih subjekata u vlasništvu povratnika u 2026. godini"

(Na poleđini koverta navesti naziv podnosioca, adresu i kontakt telefon)

Javni poziv ostaje otvoren do utroška planiranih sredstava, a najkasnije do 30.11.2026. godine

XII. INFORMACIJE O JAVNOM POZIVU

Dodatne informacije o javnom pozivu se mogu dobiti putem kontakt telefona: 033/294-139 i 033/294-136.

Broj: 04-32-4-49-1/26
Sarajevo, 10.07.2026. godine

MINISTAR

Nerin Dizdar